

Éanna dalta Cairbre chruaidh

[Rawlinson B.514, Oxford, Bodleian Library, folio 62r; published in W. M. Hennessy and D. H. Kelly, *The Book of Fenagh* (1875) 394 ff.]

[Deibhidhe, Ógláchas]

1 Enna dalta Cairpri cruaidh
ro gab tir nEnda armruaidh
facbaid an cuingidh a cloinn
a foscad cinidh Conaill.

2 Ge do fagaib Enna a cloinn
a foscad cinidh Conaill
ro treigead iad 's nir loice
go rei Asla as Tibraide.

3 Cland Eirce as Fergais gan fheill
do treicsead sil nEnna uill
do mhacuibh a mathar mban
do Murceartach 's do Moan.

4 Ge d[o] fhagaib Enna gan ail
sil nEnna gan uiresbaid
nir gab neac da sil a-lle
tar dail gor gab Tibhraide.

5 Sesca bliadhain truagh an dal
tar eis Enna enechnar
gan neart 'ga shil 'na tir tall
acht Eoganuirri as Conall.

6 Ni bidh coigcrichus fris sin
ac sil Conaill ná Eogain
im tir nEnna ba móir muirn
ar baidh ingine Louirn.

7 Earc inghean Loairn can len
máthair na n-ocht mac mortren
isa sil as treorach tall
ider Eoghan as Conall.

8 Tigernach ba tren a righ
as Feradhach go flaith- (?)
Muircerteach Muan medhach
clann Erce re Muireadhach.

9 Clann Tigearnaigh an taib te
sil Tigernaig meic Eirce
Feradhac fen flaith abaig (?)

o taid cinel Feradhaich.

10 Sil sin na ceithri mac mí
do facc Erc a nEoghtáir
sloinnfead daib a-nos gan fhaill
sil mac nE[i]rc a crich Conaill.

11 An Erc isa clanna sin
inghen Loairn a hAlpain
tuc Ferghas mac Conaill cain
í ar crud tar éis Muireadhaigh.

12 Setna Feilimid ro fes
Brenaind as Loarn laimdes
clann Erce dedhlais an druing
7 Ferghais meic Conaill.

13 Nir fhácuib Feilim do cloinn
acht Eogan becc as Colam
nir fhac Brenainn reim gan [leg. go] rath
acht mad Baithin frithcestach.

14 Loarn ba laider a glac
rob uassal primhghene a mac
Ronan athair na mac menn
Colmán Seighin [leg. Finghin] as Laisrend.

15 Na tri meic do fhagaib Earc
gan tsil acht Naimh go naeimneart
Setna aice ré silad
tuath taissech is trenrighrad.

16 Sedna mac Fergussa fail
o fuil sil Setna saernair
cinel Luigdech toir 's a-bhus
sluag Fanat go firfholluss.

17 Clann Ciarain clann Crundmhail cain
is clann Loingsicch go righaib
as iad sin co ngnimh ngosa
sil Sedna meic Fergosa.

18 Sil mac nErce sin can ail
a tir Conaill as Eogain
olc sen a cairdis bui la
do sil Cormaic meic Enna.

19 Do cuinnigh Erc chomaid caidh
ar a hochtar mac morblaith
ferann fuithe nach frith faill

sil mac nEirc a crich Conaill.

20 Tucsad meic Fergossa di
druim Lighen ar a uaisli
ar a coimhaessi as tir tall
itir Eogan as Conall.

21 Do-rinde a timna re n-ecc
Earc alainn ni himirbrec
a crich do Cairnech míadh ngal
do deghmac a derbhsethar.

22 A heich a or a hetach
a tidhlacad troimceadach
a frestal fos ag fleadaib
uaithe ar makaib Muirethaich.

23 A errad gacha bliadna
mar do bíad beo reimriaghla
as cead da gac crodh iarsin
do Cairnech ó sil Eoghain.

24 Tucsat sil Eoghain an cís
fri re Cairnich gan athscis
7 do radsad miadh ngal
'na diaid re fichid bliada(i)n.

25 Massan as Cassan iar sin
da comarba deis Cairnig
tucsat Druim Ligean gan cain
ar cis Cairnig do congbhail.

26 Tucsad clanna Neill go rath
gan cis gan fecht gan tsluaigad
cid cia ro congbadh gan tsal
cis Cairnig a dubratar [leg.a druim Ligen?]

27 Ferghos mac Muirceartaich Moir
cona cloinn uassail ardmhoir
gabsad an Druim fa cis de
fir Droma iad da eis-se.

28 Do bi an ferand amlaid sin
fri ré sesir genelac
o Enna a-nuas gan laice
go re an tinnfhír Thibraide.

29 Tibruide mac Tnuthaig tric
meic Luigdech is meic Cormaic
meic Conchobhair meic Luighdech luaid

meic Cormaic meic Enna armruaid.

30 Tainic Tibruide a Temraig
fo togairm Asla enghaicch
tangatar an dias bladhach
Ronan 7 Uarghualach.

31 Domnall mac Aedha na nech
se do cuir Tibraide as-tech
do cosnam a tiri tend
do Tibraide a nirt comlainn.

32 Tinoilis Tibruide tren
cinel Luighdeac na laemscel
Cormac Ronan rompa a-mach
Ciaran 7 Tighearnac.

33 Coimhergid cenél nEogain
fa Moel Fithrig nar deoraid
fa Conmoel croda gan cradh
fa Dalbuch fa Fearandán.

34 Torchuir Moel Fithrig ferdha
do laim Tibridi Temra
le garbmac Ronain go rath
taeth Conmhoel as Conghalac.

35 Torchair Asla fa garg gail
do laimh Dalbaig puirt Comair
torchair Dalbac sa[n] deabaid
do laim Ferghil (Ferghil) fhinnshleagaigh.

36 Uargaluch as Ronan ran
torchatar la Fearandan
torcair Fearonnán Feabail
do laimh croda Caibdhenaigh.

37 Brister tri catha ar an muigh
le Tibridi mac Tnuthaig
sil Eoghain fa mela a-muigh
as tir Enna gan esbaidh.

38 Do-beart Tibruide gan tar
don triar tainic 'na tinal
o Glais na n-enach n-eidigh
co Druim Mart- (?) na dhetigh.

39 Ruidles Tibraide gan tar
ota Dail go Finn fearlan
o leic Tamlacha go tend

co Cruachan is co Lethglend.

40 Ruidles Assla dar delbuss
o Sruthair is o Bernus
o Bir is o Mhail na ndamh
co Dail do ardghab Asal.

41 Gabsad don taib eli am dail
Ronan Uargaluch armchain
mac d'Uargalac gluaire greghach
an cuingid cruaid Caibdhenach.

42 Mac do Ronan Uargus oll
dar(u)o mac Bresal borblonn
mac d'Asla Fingein co mbloid
senathair cloinne Finghin.

43 Sil nEnna ara raibe rath
tucsad do cinel Luig[d]ech
gach dara fód 'na tir tall
gan dín a n-agaid echtrand.

44 Tugsat cinel Luigdech luinn
sochar mor don Ennacloinn
gac tres baili 'na tir tenn
doib an uair bud eisinill.

45 Le cenel nEnna gan aill
drecta rig cinil Conaill
leo san re defer n-airecht
a feiteamh san aedairect.

46 Milchoin cinil Conaill cruaidh
cinel nEnna n-enechbuain
cenel Luig[d]eac go lin nga
muine sochair sil Enna. //Enna//